

- मुख्यमंत्री भजन लाल शर्मा जयपुर रा नाहरगढ़ मांय टाइगर सफारी जनता ने सूंपी।
- प्रदेश मांय आर.टी.डी.सी. अर हुडको बीचे मोटा करार माथे सही करीजी-पर्यटन विकास सारू 415 करोड़ रुपया रो कर्ज मिलेला।
- सब इंस्पेक्टर भर्ती परीक्षा-2021 रा बारा मांय बणायी ज्यी मंत्रियां री समिति री पहली मीटिंग आज जयपुर मांय व्ही।
- राष्ट्रीय पोषण माह-2024 रा तैत कामकाज मांय राजस्थान देश मांय चौथी ठोड़ माथे रह्यो।

000

मुख्यमंत्री भजनलाल शर्मा आज जयपुर रा नाहरगढ़ हलका मांय टाइगर सफारी जनता ने सूंपी। ई मौके मुख्यमंत्री नाहरगढ़ जैविक उद्यान मांय बाघ रा दो बच्चां रा नाम ई राख्या। मादा बाघ शावक ने 'स्कंदी' अर नर बाघ शावक ने 'भीम' नाम दियो ज्यो। मुख्यमंत्री जनता ने 2 ऊं 8 अक्टूबर तांई मनाया जा रह्या वन्य जीव सप्ताह री बधाई देता थकां कह्यो के जंगली जिनावरां अर कुदरत री हिफाजत म्हां सगळा री जिम्मेदारी है। मुख्यमंत्री कह्यो के प्रदेश मांय जंगली जिनावरां री हिफाजत अर वां री तादाद बधावण माथे खास ध्यान दियो जा रह्यो है। प्रदेश मांय तीन नेशनल पार्क, 26 अभ्यारण्य, 36 कन्जर्वेशन रिजर्व अर 4 बायोलॉजिकल पार्क विकसित करी ज्या है। वे कह्यो के राज्य सरकार री कोशिशें ऊं बाघां री तादाद लगातार बध रही है अर प्रदेश मांय बाघां री तादाद करीब 130 व्हे ग्यी है। मुख्यमंत्री कह्यो के जयपुर विकास प्राधिकरण जयपुर जिला रा जीरोता मांय नगर वन अर नेवटा कने बायोडायवर्सिटी पार्क विकसित कीना है, ज्यां ऊं करीब 5 लाख लोगां ने फायदो मिलेला। कार्यक्रम मांय वन मंत्री संजय शर्मा कह्यो के टाइगर सफारी ऊं हलका मांय सैर-सपाटा ने बधावो मिलेला।

ध्यानजोग है के राज्य सरकार 453 लाख रुपया रा खर्च ऊं 30 हेक्टेयर हलका मांय टाइगर सफारी विकसित कीनी है। ई टाइगर सफारी मांय 7 किलोमीटर लंबो सफारी ट्रैक विकसित करी जो है।

0000

प्रदेश मांय वन विभाग री ओर ऊं मनायी ज्यो वन्य जीव सप्ताह आज पूरो व्हे ग्यो। ई मौके सवाईमाधोपुर मांय राजीव गांधी क्षेत्रीय प्राकृतिक विज्ञान संग्रहालय मांय राख्खी ज्या समापन समारोह मांय सप्ताह भर री जागरूकता गतिविधियां अर होड़ां जीतण वाळां ने वन विभाग री ओर ऊं ईनाम दिया ज्या।

00000

प्रदेश मांय पर्यटन विकास सारू हुडको राजस्थान पर्यटन विकास निगम ने 415 करोड़ रुपया रो कर्ज देवेला। ई बारा मांय आरटीडीसी अर हुडको बीचे करार करी ज्यो है। ई मौके उपमुख्यमंत्री अर पर्यटन मंत्री दिया कुमारी कह्यो के राज्य मांय सैर-सपाटा रा हलका मांय विकास री मोकळी संभावनावां है।

वे कह्यो के हुडको सागे व्हा ई करार ऊं पर्यटन विकास ने माली संबल मिलेला अर प्रदेश मांय सैर-सपाटा रा हलका मांय विकास और तेज व्हेला।

00000

प्रधानमंत्री नरेंद्र मोदी री अगुवाई मांय केन्द्र मांय तीजी दफा बणी सरकार रा पहला सौ दिन मांय आयुष मंत्रालय रा तैत काम कर रह्या संस्थानां मांय सात लाख ऊं बत्ता लोग ईलाज लीनो है। केंद्रीय होम्योपैथी अनुसंधान संस्थान री क्षेत्रीय निदेशक डॉ. निधि महाजन अर महाराव शेखाजी क्षेत्रीय आयुर्वेद अनुसंधान संस्थान, जयपुर रा सहायक निदेशक डॉ. बी. आर मीणा आज आयुष मंत्रालय कानी ऊं मौजूदा केन्द्र

सरकार रा पैला एक सौ दिन मांय करी ज्या कामां री जाणकारी दीनी। मीणा बतायो के मंत्रालय जनता ने गुणवत्ता सागे आयुष रो ईलाज मुहैया करावण बाबत लगातार काम कर रह्यो है अर आयुष चिकित्सा संस्थानां रा विकास अर नुवी खोजबीन रा काम कर्या जावेला।

00000

जयपुर रा पुलिस आयुक्त बीजू जॉर्ज जोसफ आज शहर रा जवाहर सर्किल थाना मांय जनसुनवाई कर र जनता री परेशानियां बेगी आगी करण सारु अहलकारां ने जरूरी हुकम दीना। वे बतायो के जनसुनवाई रे दौरान हलका मांय आपसी मुकदमा, घरेलू झगडा, जमीन रा झगडा, मकानां माथे गैर कानूनी कब्जा, चोरी, मारपीट अर धमकावण सरीखी शिकायतां मिली।

000

सब इंस्पेक्टर भर्ती परीक्षा-2021 ने रद्द करण रा बारा मांय विचार करण सारु बणायी ज्यी मंत्रियां री समिति री आज पहली मीटिंग व्ही। जयपुर मांय व्ही मीटिंग मांय स्पेशल ऑपरेशन ग्रुप (एसओजी) रा ए.डी.जी. वी.के. सिंह हाल ताई करीजी गिरफ्तारियां अर गड़बड़ियां ऊं जुड़्या सबूतां री जाणकारी दीनी। समिति एसओजी ऊं मिली रपट माथे विचार करेला। मामला मांय आगली मीटिंग 10 अक्टूबर ने व्हेला। मीटिंग पाछे खबरनवीसां सागे बातचीत करता थकां कैबिनेट सब कमेटी रा संयोजक अर कानून मंत्री जोगाराम पटेल कह्यो के ई मामला मांय हाल ताई 100 ऊं बत्ती गिरफ्तारियां व्ही है अर केई और लोगां माथे ई शंका है। ध्यानजोग है के सब इंस्पेक्टर भर्ती परीक्षा-2021 मांय गड़बड़ियां री शिकायतां री जांच सारु सरकार छह मंत्रियां री समिति बणायी है। इण मांय जोगाराम पटेल, गजेंद्र सिंह खींवर, सुमित गोदारा, बाबूलाल खराड़ी, जवाहर सिंह बेदम अर डॉ. मंजू बाघमार सदस्य है।

00000

राष्ट्रीय पोषण माह-2024 रा तैत राख्यी ज्या कार्यक्रमां री प्रविष्टियां मांय राजस्थान देश मांय चौथी ठोड़ माथे रह्यो है। समेकित बाल विकास सेवा निदेशक ओ. पी. बुनकर आ जाणकारी दीनी। ई होड़ मांय महाराष्ट्र अव्वल रह्यो जद के बिहार दूजी अर छत्तीसगढ़ तीजी ठोड़ माथे रह्यो।

00000

उत्तर पश्चिम रेलवे री ओर ऊं 15 अक्टूबर ताई स्वच्छता पखवाड़ो मनायो जा रह्यो है। उत्तर पश्चिम रेलवे रा मुख्य जनसम्पर्क अधिकारी कैप्टन शशि किरण बतायो के स्वच्छता पखवाड़ा रा तैत 3 ऊं 6 अक्टूबर ताई स्वच्छ स्टेशन अर स्वच्छ रेलगाड़ी दिवस रा तैत टेशनां माथे साफ सफाई रा खास अभियान चलायी ज्या। आज स्वच्छ पटरी रा तहत रेल री पटरियां री दोन्यू ओर सफाई करीजी। पखवाड़ा रा तैत स्वच्छ परिसर रा तहत रेल परिसर, काम री ठोड़ां अर रहवासी हलकां मांय सफाई करी जावेला। स्वच्छ आहार अर स्वच्छ नीर दिवस मांय सगळी खान-पान इकाइयां मांय सफाई माथे खास जोर दियो जावेला।

00000

राजस्थान राज्य शैक्षिक अनुसंधान अर प्रशिक्षण परिषद् उदयपुर री ओर ऊं प्रदेश मांय न्यारी-न्यारी ठोड़ां आज बाल विज्ञान मेळा सरु व्ह्या। अ मेळा तीन दिन चालेला। अजमेर रा पुलिस लाइन राजकीय उच्च माध्यमिक विद्यालय मांय लगाया जा रह्या मेळा मांय जिला री 80 ऊं बत्ती स्कूलां रा साढ़े चार सौ ऊं बत्ता विद्यार्थी सिरकत कर रह्या है। मेळा मांय विज्ञान मॉडल रा दरसाव करण सागे ई सेमिनार अर प्रश्नोत्तरी री होड़ां राख्यी जा रही है। दौसा री महात्मा गांधी रेलवे स्कूल मांय विज्ञान मेळा रो पेली वाळा विधायक शंकर शर्मा उद्घाटन कीनो। बाड़मेर जिला रा गुढामालानी मांय ई जिला स्तर रो विज्ञान मेळो आज सरु व्ह्यो।

0000

तंबाकू नियंत्रण कार्यक्रम रा तैत आज पाली मांय जिला कलेक्टर एल.एन. मंत्री टोबैको फ्री यूथ कैपेन 2.0 रा पोस्टर रो विमोचन कीनो। ई मौके अहलकारां ने तंबाकू काम नी लेवण अर घर वाळां ने ई तंबाकू ऊं बण्या सामान काम नी लेवण री शपथ दिरायी ज्यी। जिलां मांय ई न्यारा-न्यारा महकमां ने टोबैको फ्री यूथ कैपेन री 60 दिन री कार्ययोजना रे मुजब तंबाकू उत्पादां रा गलत असर रा बारा मांय जाग जगावण रा हुकम दिया ज्या है।

00000

अन्तर्राष्ट्रीय बालिका दिवस सप्ताह रा तैत आज पाली मांय पुलिस री ओर ऊं केन्द्रीय विद्यालय अर राजकीय उच्च माध्यमिक विद्यालय बांगड री 100 टाबरियां ने खुद री हिफाजत री सिखावण दीरीजी। ई सागे ई वां ने महिला सुरक्षा सलाह केन्द्र, हेल्प लाईन नम्बर 181, 1090, 1091 रा बारा मांय जाणकारी दीरीजी अर इन्दिरा महिला शक्ति केन्द्र री ओर ऊं कन्या भ्रूण हत्या रोकथाम अर बाळपणा मांय ब्याह रोकण रा बारा मांय ई बतायी ज्यो।

000000

चूरू जिला रा सांडवा गांव मांय लाग रहया पशु मेळा मांय हाल ताई 1 हजार 200 ऊं बत्ता ऊंट, बळद, गाय, भैंस अर घोड़ा बिकी सारू लायी ज्या है। आं मांय ऊं 200 ऊं बत्ता ढांढा बिक गया है। सांडवा ग्राम पंचायत कानी ऊं लगाया जा रहया ई मेळा मांय बीकानेर, नागौर, हनुमानगढ़ अर हरियाणा, पंजाब अर उत्तर प्रदेश रा कारोबारी ढांढा री खरीद फरोख्त सारू सिरकत कर रहया है।

0000

सिरोही जिला रा आबूरोड मांय आध्यात्मिकता द्वारा स्वच्छ एवं स्वस्थ समाज मुद्दा माथे राखी ज्यो चार दिन रो वैश्विक शिखर सम्मेलन आज पूरो व्हे ग्यो। सम्मेलन रा समापन सत्र मांय मध्य प्रदेश रा उपमुख्यमंत्री राजेंद्र शुक्ला कह्यो के देश रा पूरा विकास सारू सनातन संस्कृति ने अपनावणो व्हेला। सम्मेलन मांय भारत समेत 15 ऊं बत्ता देशां री पांच हजार ऊं बत्ती हस्तियां सिरकत कीनी। सम्मेलन रा न्यारा-न्यारा सत्रां मांय कला, धर्म, संस्कृति, आध्यात्म, राजनीति, विज्ञान, चिकित्सा अर शिक्षा समेत न्यारा-न्यारा हलकां रा विद्वान विचार कीनो।

00000

आज विश्व पर्यावास दिवस मनायी ज्यो। ओ दिन हर एक जणा रा साफ-सुथरा अर सुरक्षित ठोड़ माथे रेहवण रा हक माथे जोर देवे है। आज ही विश्व कपास दिवस ई मनायी ज्यो। कपास रा महत्त्व री पिछाण करण अर दुनिया मांय कपास री उपज लेवण वाळा किसानां अर कपास ऊं जुड़्या उद्योगां सामी आवण वाळी परेशानियां रा बारा मांय जाग जगावण सारू हर साल 7 अक्टूबर ने ओ दिन मनायो जावे है। भारत कपास री उपज लेवण वाळो चीन पाछे दुनिया रो दूजो मोटो देश है।

0000